


Jisas i mas

DED

from wanem?



Jisas i Mas Ded from Wanem

Original title: "Why Did Jesus Die?"

by Reggie Howard,

Christyan Books Melanesya

Used by permission

Translated into Vanuatu Bislama by Ross Webb

Checked by Lilian Navaika

VBT 2020

Jisas i Mas Ded from Wanem?

Bae yumi ansarem kwestin olsem wanem? Maet yumi talem se, "Hemi ded blong tekemaot ol sin blong yumi." Hem i tru, be from wanem? Yumi mekem sin yet. I minim se hem i ded from nating?

"Ah, be yu mas bilif long Jisas." Yes, be nating we yu bilif long Jisas ating yu mekem sin yet. Ded blong Jisas i givhan long yumi olsem wanem?

Bae yumi lukluk long 5 poen blong ansarem kwestin ya.

Jisas hemi ded blong pem panis blong sin blong yumi

Long ol vilej blong yumi, sipos wan man i mekem wan fasin nogud, yumi karem man ya i go long nakamal, afta ol man i skelem rong blong hem mo sipos oli agri se man ya i mestem, bae jif i putum faen long hem. Sipos hemi wan bigfala samting we i mekem, faen ya bae hemi wan bigfala mane.

Kot blong God

Traem tingbaot. God hemi gat nakamal blong hem, we hem nao bae i jajem yumi. "Hem i stap rulum wol ya long fasin we i stret. Hem i stap jajem olgeta man long stret fasin nomo." (Sam 9:7-8)

Bae hemi talem hamas long faen blong ol sin blong yumi? Nogat! Sipos yumi karem evri mane long wol, samting ya i no naf blong pemaot wanwan sin blong yumi from, long ae blong God, sin blong yumi i nogud we i bitim mak – hem i olsem we oltaem yumi agensem hem nomo.

God hemi talem se faen i no wan mane be hemi DED nomo (Rom 6:23)

I gat tu kaen ded

Tok blong God i talemaot 2 kaen ded; wan blong bodi mo wan blong spirit. Ale wan we God hemi tokbaot se hemi pei blong sin hemi namba 2 ded. (Rev 20:13-15)

Yumi save win long kot blong God

Be sipos God hemi fogetem ol sin blong yumi, we hem i talem se "I oraet nomo"? God i save mekem olsem? Nogat. God i no save mekem olsem from we hemi stret evriwan, evri samting i mas stret long tingting blong hem, mo from samting ya hem i wan stret jaj tu. "God i talem se, "Mi putum taem finis blong jajem ol man, mo bambae mi jajem olgeta long stret fasin." (Sam 75:2) "Hem bambae i jajem ol man blong ol narafala kantri. ... Hem bambae i daonem ol king long olgeta ples long wol." (Sam 110:6)

I gat wan rod nomo we hemi save talem long yumi se yumi no gat faen blong pem; Wan nara man i mas pem, mo man ya i no mas gat wan sin nating long hem. Man ya hem i Jisas. Hem i pemaot wanem we yumi sud pem. From we Jisas i neva sin, hem i save pem fulwan wanem we yumi sud pem long God. "Kraes i no mekem sin nating. Be blong sevem yumi, God i mekem hem i karem ol sin blong yumi, blong God i save givim stret fasin blong hem long yumi ya we yumi joen long Kraes, blong mekem yumi kam stret man long fes blong hem." (2Korin 5:21)

Jisas Kraes hem i pemaot evri kaon we yumi gat from sin blong yumi. Bambae yumi evriwan i go long kot blong God mo stanap long fored blong jaj, be yumi no save fraet. "Naoya, i no gat wan man nating we i save jajem yumi ya we yumi stap joen long Jisas Kraes, se bambae yumi mas kasem panis." (Rom 8:1)

Yes, Jisas hem i ded blong karemaot sin blong yumi. Taem yumi singaot long Jisas blong fogivim ol sin blong yumi, mo yumi tingting strong blong lego ol sin we yumi stap mekem fastaem, God nao i save fogetem nomo evri sin we yumi bin mekem. Hem i save fogetem from we wan man i pemaot finis faen blong sin. Taem yumi go long kot blong God hem bae i


letem yumi nomo. "Hae God i talem se, 'Bambae mi fogivim yufala, mi tekemaot ol sin blong yufala, mo bambae mi no moa save tingbaot olgeta bakegen. Mi mi Hae God, mo hemya tok blong mi.'" (Jeremaea 31:34)

Ol kwestin blong ansarem

1. Hu bambae i save stanap long long kot blong God? (Sam 94:2)

2. I stret blong God i fogetem nomo ol sin blong yumi mo yumi no pem? (Sam 75:2)

3. Blong God i save letem yumi taem yumi stanap long kot blong hem, yumi mas mekem wanem nao ya? (Rom 8:1) _____



Jisas hemi ded blong karemaot bigfala kros blong God long yumi

Wanem kaen kros?

Baebol i stap talem long yumi se God hem i save kros. (Rom 1:18, 2:8, Efesas 5:6) Be yumi mas save kros blong God hem i olsem wanem. I no stret blong ting olsem we kros blong God i olsem kros we yumi stap mekem. No, kros blong God i defren long kros blong yumi.

Plante taem yumi kros long wan man be rong i stap long yumi nomo. Be God hem i neva mekem rong samting o rong tingting (Jemes 1:20, 1Jon 1:5)

Yumi save kros haryap. Be God i no save kros haryap (Sam 103:8)

Plante taem yumi kros be i nogat wan gud risen blong yumi kros olsem. God i kros nomo long taem hem i gat wan gud risen.

Tingbaot. From wanem yumi kros? Yumi kros taem wan man o wan samting i spolem wan samting we yumi tingse hem i hevi o wan samting blong yumi. Be olsem wanem? I gat wan man o wan samting i save spolem God? Nogat. Yumi smol tumas. Yumi nogat paoa blong spolem God.

Aesea 40 i talem we ol man blong faet long ol kantri blong wol oli olsem nating long lukluk blong God. God hem i big tumas mo I strong. Wan smol samting olsem i no save mekem hem i kros. Sipos i olsem, wanem nao i stap mekem God i kros?

Kros blong God

God i laekem tumas ol man long wol (Jon 3:16) Hem i tru. Be God hem i wan God we hem i stret evriwan. Hem i holi. Hem i klin. I Mekem se hem i kros long evri sin blong yumi. "Yu yu tabu we yu tabu. Yu no wantem nating blong luk ol rabis fasin, mo ol samting nogud we ol man oli stap mekem, oli no stret nating long ae blong yu." Habakuk 1:13)

Yes ya, God hem i olsem wan faea we i hot we i hot mo i save bonem finisim evri man we i wantem mekem sin nomo. Olsem we Baebol i talem se, "Hae God i God blong yumi, mo kros blong hem i olsem faea we i laet." (Dutronome 4:24)

Yu lesen long wanem we God i talem se bambae i kamtru long fiuja.

"Nao ol king blong wol, wetem ol bigfala jif mo ol hed kapten blong ol soldya, wetem ol rijman mo ol haeman, wetem ol narafala man, ol slef wetem ol friman, oli go haed. Olgeta evriwan oli go haed long ol bigfala hol blong ston olbaot long ol hil. Nao oli talem long ol bigfala hil mo ol ston ya se, 'Plis yufala i foldaon antap long mifala, yufala i haedem mifala, nao bambae mifala i no pas long fes blong Man ya we i stap sidaon long bigfala jea blong king, mo Smol Sipsip ya bambae i no save panisim mifala. Bigfala Dei ya blong tufala, we bambae tufala i panisim ol man from sin blong olgeta, i kamtru finis. ? Hu nao bambae i naf blong stanap long Dei ya?" (Rev 6:15-17)

Yu luk! Kros blong God hem i no wan pleplei samting. I moa gud yumi ron i go long Jisas mo hang long hem olsem man blong sevem yumi long bigfala kros blong God! Baebol i talem, "Man we i bilif long Pikinini ya blong God, hem i gat laef ya we i no save finis. Be man we i no save obei long Pikinini ya, hem bambae i no save luk laef ya samtaem. Mo man olsem, God bambae i stap kros long hem olwe nomo." (Jon 3:36)

Kros blong God i save go daon olsem wanem?

God i kros tumas long sin blong yumi. Hem i bos blong yumi mo sipos yumi sin, hem i kros nao long yumi. Be sipos yumi wantem, God i save mekem we evri sin blong yumi i no moa gat long fes blong hem.

God hem i olsem wan faea we i laet we i laet mo wan sinaman i no save go klosap long hem. Be i gat wan samting nomo we i save wasemaot ol sin blong yumi. Hem ya blad blong Jisas Kraes.

"God i givim Jisas Kraes blong hem i ded, blong blad blong hem i save tekemaot ol sin blong ol man we oli bilif long hem." (Rom 3:25)

“Long wan sakrefaes ya nomo we Kraes i mekem, hem i mekem ol man oli tabu.” (Hibru 10:14)

Mekem se, taem yumi lukluk long Jisas blong hem i save sevem yumi, kros blong God i finis long yumi nao. Bambae hem i no save givim panis long yumi from ol sin blong yumi.

Long stret dei we God i makem finis bigfala kros blong God bambae i meksave olgeta man we oli no ron long Jisas blong hem i save sevem olgeta. Ol man we oli joen gud long Kraes nomo bae oli no filim.

“Taem God i jajem ol man nogud, i givim panis long olgeta, Jisas bambae i sevem yumi blong yumi no kasem panis ya.” (1Tes 1:10)


Hem ya wan gud nius ya! Yumi mas glad from!

Ol kwestin blong ansarem

1. Wanem i mekem God i kros tumas? (Habakuk 1:13) _____

2. God i kros long hu? (Jon 3:36) _____

3. Sipos yumi no wantem filim strong kros blong God, yumi mas mekem wanem? (Rom 3:25, 1Tes 1:10) _____



Jisas hemi ded blong givim stret fasin blong hem long yumi

I gat wan toktok long Niutestamen we i had lelebet blong andastanem. Toktok ya hemi "stret long fes blong God." Yumi ridim toktok ya plante taem long Rom japta 3 mo 4 mo 5, mo long Galesya japta 2 mo 3, mo long sam narafala pasej tu.

Toktok ya i had blong kasem mining blong hem from we yumi save we laef blong yumi i no stret nating. Mekem se yumi mas askem wan strong kwestin olsem, "Hem i tru we God i talem se hem i save mekem yumi kam stret nomo long fes blong hem?"

God i save mekem olsem?

Sin blong Adam

I gat wan storian i go olsem. Long wan taem fren blong mi, woman blong hem i bonem wan pikinini boe. Hem i bon be wan samting i rong long hed blong hem mo hem i laef 3 aoa nomo, afta i ded. Samting ya i had tumas. From wanem i olsem? Pikinini ya i no mekem wan rong samting. Hem i no talem wan rong samting. Hem i no stilim wan samting. Hem i no tingting nogud long wan man. Hem i no kros long mama blong hem. Be sipos yumi ol man i save ded from ol sin blong yumi, from wanem pikinini ya i ded? Hem i no mekem wan sin nating.

Afta, mi ridim toktok we i stap long Rom 5:17 mo 18. "I tru we long sin ya blong wan man nomo, man ya i mekem we ol man oli stap ded."

Mekem se pikinini blong fren blong mi i no ded from sin blong hem wan, be from sin blong Adam. Yumi evriwan, yumi ol pikinini blong Abu man Adam mo Abu woman Iv. Mo sin blong tufala i stap long mifala mo yumi evriwan i mas ded from.

Stret fasin blong Jisas

Ale, tingbaot storyan blong man ya we hem i hang long wan kros wetem Jisas taem oli kilim Jisas i ded. Man ya hem wan man nogud. Hem i wan kriminol mo oli putum hem long kot fastaem nao ol talem se i mas ded. Hem i ded long sem mak taem oli kilim Jisas.

Hem i stap hang long kros blong hem mo hem i luk Jisas mo hem i save se Jisas hem i wan stret man. Hem i no wan sinaman olsem hem. Ating hem i wokemaot se Jisas i no hang long kros from ol sin blong hem. Maet hem i wokemaot se Jisas nao hem i man we God i promes blong sanem i kam long wol blong i save ded from ol man long wol we oli mekem sin. Hem i talem long Jisas, "Jisas, taem we yu yu kam King, nao yu kam long paoa blong yu, plis yu tingbaot mi bakegen." (Luk 23:42)

Afta Jisas i talem long hem se, "Tru mi mi talem long yu. Tede, yu bambae yu stap wetem mi long Paradaes." (Luk 23:43)

Jisas i talem olsem long hem from wanem? Hem i no wan gudfala man. Hem i man nogud Mo hemi kasem panis blong hem. Maet hem i no baptaes. Maet hem i no wan man blong jos. Maet hem i no ridim Baebol o prea. Be Jisas i talem long hem se bae hem i go long heven. Weswe?

Yu tingbaot Rom 5:18-19 we i stap talem olsem, "sin ya we wan man nomo i mekem, hem i mekem we God i jajem ol man se oli mekem i no stret, oli mas panis. Mo long sem fasin, stret samting ya we wan man nomo i mekem, hem i mekem we God i talem se ol man oli save go fri, oli save laef. Nao from we wan man nomo i no obei long God, olgeta man oli kam man nogud. Be long sem fasin, from we wan man nomo i obei long God, God i mekem we plante man oli kam stret man long fes blong hem."

From samting ya, wan bebi i save ded from we sin blong Adam i mekem yumi evriwan i no stret long fes blong God. Be wan man we i nogud evriwan i save go long heven from we Jisas hem i obei long Papa blong hem. Stret fasin blong Jisas nao, i save mekem yumi man nogud i save kam stret long fes blong God.

Hem i blong yumi wanwan

Toktok long 2Korin 5:21 hem i gud tumas. Hem i talemaot klya long yumi wanem Jisas i mekem blong givhan long yumi. "Kraes i no mekem sin nating. Be blong sevem yumi, God i mekem hem i karem ol sin blong yumi, blong God i save givim stret fasin blong hem long yumi ya we yumi joen long Kraes, blong mekem yumi kam stret man long fes blong hem."

Ale, yumi wanwan i save kam stret long fes blong God mo nomoa save pas long jajmen? Yes, yumi man we yumi joen long Kraes yumi stap sin yet, be God i mekem wan samting long yumi we i gud bitim mak.

Neva Jisas i mekem wan sin. From we i olsem hem i wan man we hem i no gat poen nating long hem. Be Jisas i tekem ples blong yumi mo hem i ded olsem wan man we i mekem sin. Olsem wanem long stret fasin blong hem? God i givim stret fasin blong hem long yumi we yumi stap bilif long Jisas. Nao i olsem we yumi nogat poen nating long yumi.

"Long gladhat blong God, hem i stap givhan long olgeta. Hem i stap mekem olgeta oli stret man long fes blong hem, from we oli joen long Jisas Kraes we i pem rod finis, blong olgeta oli go fri." (Rom 3:24)

Ol kwestin blong ansarem

1. From wanem wan smol bebi i save ded? (Rom 5:17) _____

2. From wanem wan kriminol i save go long heven (Rom 5:18-19)

3. Jisas hem i tekem ol sin blong yumi i go long hem wan. From we hem i mekem olsem, yumi stap olsem wanem nao long fes blong God?
(2Korin 5:21, Rom 3:24) _____

Jisas hemi ded blong lidim yumi i go long God

Hem i karem blad blong hem i go long heven

God i stap wea? Hem i stap long wan ples we yumi no save go long hem. "Hem nomo i stap we i stap we i no save ded samtaem, mo ples blong hem i stap long delaet we i saen we i saen, we man i no save kam klosap long hem. I no gat man yet we i luk hem, mo i no gat man we bambae i save luk hem samtaem. Oltaem yumi mas leftemap nem blong hem, mo yumi mas talemaot we paoa blong hem bambae i stap oltaem gogo i no save finis. Amen (1Timoti 6:16)

Long taem blong Oltestamen God i talem long laen blong hem blong oli mas mekem wan haos tapolen. Hem ya wan haos we i tabu blong ol man i go insaed.

Haos tapolen ya hem i wan pija blong tijim ol man se God hem i holi mo i tabu. God i glad blong stap wetem ol pipol blong hem be oli no save go klosap long hem. Hem i letem wan man nomo i save go insaed long wan rum we i stap insaed long haos ya, mo man ya i save go wan taem nomo long wan ya. Be long ol narafala dei hem i no save go insaed.

Be long stret dei ya, taem man i alao blong go insaed, hem i mas karem blad blong buluk i go wetem. Blad ya hem i mas saksakem long Bokis blong Promes we i stap insaed long rum blong makem presens blong God. Nao, taem yumi luk blad yumi save se wan samting i ded. Blad blong buluk we man ya i karem i go, hem i pija we i poen long blad blong Jisas we i kamaot long hem long ded blong hem long kros.

"Nao taem Kraes i go insaed long Haos Tapolen ya, hem i go stret insaed long Rum we i Tabu we i Tabu, be hem i no mekem olsem we ol narafala hae pris oli mekem. Hem i no tekem blad blong man nani mo blad blong smol bul blong tekemaot ol sin blong ol man, nogat. Hem i tekem blad blong hem nomo, nao i go insaed wan taem nomo, i mekem wok ya blong tekemaot ol sin blong yumi, mo i mekem yumi fri, nao bambae yumi fri gogo i no save finis." (Hibru 9:12)

“Long niufala sakrefaes ya, God i letem Jisas Kraes i ded wan taem nomo blong mekem yumi klin, yumi tabu, olsem we hem i wantem.”
(Hibru 10:10)

Blad blong Jisas i wasem yumi klin

Baebol i talem se Jisas i karem blad blong hem i go long heven. Hem i mekem olsem blong soemaot se hem i wasemaot ol sin blong yumi. Blad ya blong hem, we i makem ded blong hem, i openem rod blong yumi save go long ples ya taem yumi ded, o taem Jisas i kambak bakegen. Jisas i go bak long heven be blad blong hem i helpem yumi yet long wol ya.

“Be blad blong Kraes i save winim wok blong ol samting ya blong bifo. Kraes i olsem wan anamol we i no gat wan samting nating i rong long bodi blong hem, we oli kilim blong tekemaot sin blong man. Long paoa blong Tabu Spirit ya we i stap oltaem nomo, hem i givim laef blong hem i go long God. Blad ya blong hem i stap mekem tingting blong yumi i klin long ol samting we yumi mekem we i blong ded nomo, blong yumi save mekem ol wok blong God ya we i laef, i stap we i stap.” (Hibru 9:14)

Taem yumi harem nogud from ol sin blong yumi God i stap talem long yumi se tingting mo hat blong yumi i klin finis.

“Bifo, yufala i strenja long God, yufala i enemi long hem, from we tingting blong yufala i agensem hem, mo fasin blong yufala i nogud. Be naoia, from we Kraes i kam man olsem yumi, mo i ded, God i mekem yufala i fren blong hem bakegen long ded blong Kraes. God i mekem olsem, blong bambae hem i save tekem yufala i go stanap long fes blong hem, we yufala i tabu, yufala i klin gud, i no gat rabis poen long yufala nating.”
(Kolosi 1:21-22)

Nao Yumi save Kasem evri gudfala samting blong God

“I gud yumi stap talem tangkiu long God ya we i God mo Papa blong Jisas Kraes, Masta blong yumi, from we hem i mekem i gud tumas long yumi ya we yumi joen long Kraes. Hem i givim evri gudfala samting ya long yumi we yumi mas gat blong laef blong yumi wetem hem long heven. Taem God i no mekem wol ya yet, be hem i jusumaot yumi finis blong bambae yumi joen long Kraes. God i wantem blong yumi tabu, yumi man blong hem, nao long fes blong hem, oltaem bambae yumi no gat rabis poen long yumi, mo

yumi stap lavlavem yumi. Bifo olgeta, hem i makemaot yumi blong bambae hem i openem rod long Jisas blong tekem yumi, yumi kam pikinini blong hem. Hemia i tingting blong hem nomo, mo hem i glad blong mekem olsem." (Efesas 1:3-5)

"God i stamba blong pis blong yumi, mo bambae i no longtaem, hem i flatem gud Setan, we bambae yufala i save purumbut long hem." (Rom 16:20)

"I gud yumi stap talem tangkiu long God ya we i God mo Papa blong Jisas Kraes, Masta blong yumi. Hem i Papa blong yumi we i gat sore, hem i God we i stamba blong fasin blong givhan." (2Kor 1:3)

"Mi bambae mi Papa blong yufala, mo yufala bambae i pikinini blong mi, yufala ol boe mo gel blong mi. Mi mi Hae God, mi gat olgeta paoa, mo hemia tok blong mi." (2Kor 6:18)

"Be God i stap soemaot we hem i lavem yumi tumas, mo i stap mekem i gud tumas long yumi, mo hem i singaot yufala blong joen long Kraes long gudfala laef ya blong heven we i no save lus samtaem." (1Pita 5:10)

"Yumi savegud fasin blong God blong lavem yumi, mo yumi bilif se hem i lavem yumi. God, hem i stamba blong fasin blong lavem man. Man we i stap holem fasin ya oltaem, hem i stap joen gud long God, mo God i stap joen gud long hem." (1Jon 4:16)

God hem i stamba blong evri gudfala samting. I gud blong yumi stap klosap long hem oltaem.

Ol kwestin blong ansarem

1. I had blong yumi go long heven, o i isi nomo? (1Tim 6:16)

2. Jisas i karem wanem i go long heven blong sevem yumi from sin blong yumi? (Hibru 9:12) _____

3. God i mekem wanem blong yumi save stap fren wetem hem?
(Kolosi 1:21-22)
-

Jisas hemi ded blong statem wan niufala famle

Talemaot Gud Nius blong Jisas

Afta long taem Jisas i ded mo i laef bakegen, hem i kamaot long ol man blong hem i mo i talem long olgeta se, "Tok we i stap long Baebol i talem se bambae ol man oli mekem Mesaea i harem nogud long bodi blong hem, gogo i ded. Mo long namba tri dei blong hem, bambae hem i laef bakegen. Mo long nem blong Mesaea ya, bambae ol man oli mas talemaot tok ya, se man i mas tanem tingting blong hem from sin blong hem, nao bambae God i fogivim hem. Tok ya i mas go long olgeta man, i stat long Jerusalem ya, gogo i finisim wol. Yufala i luk ol samting ya, mo yufala i save talemaot stret tok blong hem. Mo mi bambae mi sanem Tabu Spirit i kam long yufala, we Papa blong mi i promes blong givim long yufala. Be yufala i mas wet long taon ya gogo paoa ya blong God i aot long heven i kamdaon, i mekem yufala i strong." (Luk 24:46-48)

Nao ol disaepol ya oli mekem wanem we Jisas i talem long olgeta se oli mas mekem. Oli stat long Jerusalem mo oli go aot long evri ples mo talemaot gudfala nius blong Jisas.

Stamba tingting blong nius ya se Jisas i ded blong karemaot sin blong yumi. Taem Pol i stap go long wanwan ples olbaot hem i talem aot gudfala nius ya long ol man.

Pol i talem se, "Taem mi stap wetem yufala, mi putum tingting blong mi i stap strong long wan samting nomo. Mi stap tokbaot Jisas Kraes nomo, mo antap moa, mi stap talemaot we hem i ded long kros." (1Korin 2:2)

Pol i talemaot gudfala nius ya olsem mo plante man i kasem olsem wan tru toktok nao i talem se, "Ol man Galesia! Yufala i krangke! Mifala i talemaot gud nius long yufala, olsem we yufala i luk Jisas Kraes stret long ae blong yufala, we hem i ded long kros." (Gal 3:1) "Taem mitrifala i tekem gud nius i kam long yufala, mifala i no toktok nating nomo. Mifala i toktok, mo mifala i stap mekem ol merikel long paoa blong Tabu Spirit, mo mifala i bilif strong se gud nius ya i tru." (1Tes 1:5)

Plante man oli bilif

Ol disaepol blong Jisas ol go long ol defdefren ples blong talemaot gudfala nius ya. Mo long evri ples, sam man oli bilif long Kraes. Olgeta we oli bilif, paoa blong God i jenisim laef blong olgeta. "Be God ya we i Sevia blong yumi, hem i sevem yumi long taem ya we hem i soemaot ol fasin blong hem, we i lavem tumas ol man, mo we hem i stap mekem i gud long olgeta. Be hem i no mekem olsem from we yumi stap folem ol gudfala fasin, nogat. Hem i sevem yumi from we hem i gat sore long yumi. Hemi wasem yumi long wota, i mekem we yumi bon bakegen long Tabu Spirit we i givim niufala laef long yumi. God i givim Tabu Spirit i kam bigwan long yumi, mo Jisas Kraes, Sevia blong yumi, hem i wok blong God blong sanem Spirit ya i kamtru long yumi. God i sevem yumi, blong bambae yumi save kam stret man long fes blong hem from we Kraes i givhan long yumi long gladhat blong hem, nao bambae yumi save kasem laef ya we i no save finis, we yumi putum tingting blong yumi i stap finis long hem. (Taetas 3:4-7)

I tru ya! Stat long taem ol disaepol i stat blong talemaot nius ya kam kasem tudei, ol man blong God oli taltalemaot gudfala nius blong Jisas Kraes. Ol man ya oli lego kantri blong olgeta mo go olbaot long wol blong yumi save harem gudfala storian. Yumi mas talem tangkiu long God from!

Taem yumi harem gudfala storian blong God mo yumi bilif long Jisas, fulap samting i stap jenis long laef blong yumi. "Taem we God i joenem man long Kraes, hem i mekem man ya i kam wan niufala man. Ol fasin blong laef blong hem bifo oli finis, nao laef blong hem i kam niuwan olgeta. (2Korin 5:17)

Wan samting we i jenis long laef taem wan man i kam long Kraes, hemi we man ya i kam wan famle wetem fulap narafala man. Hemia famle blong God!

Famle blong God

Yumi joen wetem famle blong God olsem wanem? Yumi bon long hem. Niufala papa blong yumi we hem i stap rulum evri samting long heven mo long wol, hem i mekem yumi. Jon 3:16 i talem we yumi "bon bakegen."

"Mo Tabu Spirit ya we God i givim finis long yufala, hem i no blong mekem yufala i olsem ol slef nomo blong God, we yufala i fraet long hem, nogat. Spirit ya i blong mekem yufala i pikinini blong God. Mo long paoa blong Spirit ya, taem yumi prea, yumi stap talem long God se, "Papa blong mifala." Spirit ya blong God i kam joen long tingting blong yumi, blong talemaot we yumi pikinini blong God. Nao from we yumi pikinini blong hem, bambae yumi save kasem ol gudgudfala samting we hem i putum olgeta oli tabu, se bambae oli blong ol man blong hem. Mo bambae yumi save joen long Kraes blong kasem haf long ol gudgudfala samting we God i putum olgeta oli tabu, se bambae oli blong Kraes. Mo from we yumi joen long Kraes blong harem nogud olsem we hem i harem nogud, be bambae yumi save joen long hem bakegen, blong kasem gudfala laef blong hem long heven." (Rom 8:15-17)

I tru ya! God i blesem yumi bitim mak. Yumi gat wan papa we hem i lavem yumi tumas. Famle blong yumi i bigwan we i bigwan. Yumi gat hamas taosen brata mo sista blong yumi we oli stap olbaot long evri kantri long wol. Mo Jisas hem i olsem bigfala brata blong yumi evriwan we yumi stap bilif long hem (Hebrews 2:11; Romans 8:29; Mark 3:34).

"Bifo olgeta, God i jusumaot yumi, i mekem yumi tabu, blong biae bambae yumi save kam olsem Pikinini blong hem, Jisas Kraes. God i mekem olsem, blong bambae Pikinini ya blong hem, hem i olsem fasbon long plante brata." (Rom 8:29)

Wetem toktok ya bae yumi mekem wanem? Bae yumi talem tangkiu long God mo presem hem from!

Storian blong wan pua man

Evri dei i gat wan man we i stap sidaon aotsaed long wan stoa. Fes blong hem i doti. Hea blong hem i doti. Klos blong hem i doti mo i brokbrok. I luk olsem hemi wan man we i no glad nating.

Hem i stap sidaon mo lukluk daon long graon nomo. Hem i putum wan plet long saed blong hem mo stanemap wan saen we i stap talem, "Plis, yu givhan long mi. Mi pua tumas. Mi nogat haos. Mi nogat graon. Mi nogat garen. Mi nogat famle. Sipos yu givim smol vatu long mi, bae mi save kakae tudei. Sipos no, bae mi slip hangre nomo. Bae yu helpem mi o no?"

Nao, mi mi no save se wanem we hem i talem i tru o i no tru, be mi mi sore long hem mo wanwan taem mi putum man long plet blong hem.

Be taem mi luk man ya, mi stap tingbaot toktok we hem i raetem long saen blong hem se, "Mi no gat famle". Sipos man ya i save lego ol sin blong hem mo askem Jisas blong fogivim ol sin blong hem mo biae long Jisas nomo, mi save we bambae hem i gat fulap famle. Mi save from we Jisas i promes olsem long Mak 10:29-30.

"Jisas i talem se, "Man we i tinghevi long mi, mo long gud nius blong mi, nao hem i lego haos blong hem, no brata no sista blong hem, no papa mo mama blong hem, no pikinini blong hem, no graon blong hem, hem bambae i no save sot long ol samting ya. Tru mi talem long yufala. Long wol ya, wanem samting we hem i lego, olsem haos blong hem, no brata no sista blong hem, no mama blong hem, no pikinini blong hem, no graon blong hem, bambae hem i save kasem wan hundred taem antap bakegen. Be ol man bambae oli mekem i nogud long hem tu. Be long niufala wol ya we bambae i kam, hem bambae i gat laef we i no save finis."

Evri man we hem i lego famle blong go long narafala kantri blong talemaot gud nius blong Jisas, oli save se toktok ya i tru nomo.

Yumi ol man we yumi bilif long Kraes, yumi mas glad nomo long niufala famle ya. Hemia famle blong God!



